

Lětuše posedženje komisije za słowjanske spisowne rěče při Mjezynarodnym komiteju slawistow wotměje so wot 18. do 21. junija w Budyšinje. Wjeselu so, zo su přijěli hosćo z Ruskeje, Serbiskeje, Słowjenskeje, Bołharskeje, Pólskeje, Čěskeje, Słowakskeje, Rakuskeje kaž tež z němskeho města Gießen. Wobžaruju, zo su člonoj komisije z Běloruskeje, Ukrainy, Makedonskeje kaž tež z Bosniskeje-Hercogowiny dyrbjeli wotprajíc, a to běrokratickich zadžěwkwow resp. fincielnych přičin dla. Bohužel je předsydka našeje komisije, prof. Hana Gladkova z Prahi, schorjela – přejemy jej po tutym puću bórzmne wustrowjenje!

Njeje to přenje džělowe zetkanje člonow komisije za spisowne rěče tu w Budyšinje. Hižo w lěće 1977 móžeše tehdyši člon a zastupjer Łužiskich Serbow w tutym gremiju, prof. dr. Helmut Faska, wědomostnikow-slawistow z tu- a wukraja w Budyšinje powitać. Rozprawa wo zeńdženju z pjera prof. Faski je dokumentowana w „Lětopisu“, a tak čitach, zo wěnowaše so posedženje tehdy prašenjam normy a kodifikacije spisownych rěčow. „*Na wuradźowanju wobjedna so w žiwej a plódnej diskusiji 14 přednjesenych referatow [...]*“.<sup>1</sup> Dalša rozprawa dr. Ireny Šěrakoweje je so w kulturnym časopisu „Rozhlad“ wozjewila.<sup>2</sup>

Wjeselu so jara, zo su prof. Helmut Faska, dr. Irena Šěrakowa kaž tež dołholetny wotrjadnik rěčespyta a tohorunja z prašenjami spisownych rěčow so zaběracy sorabist dr. Helmut Jenč džensa tu přitomni!

Komisiju je před lětdzesatkami založil Alois Jedlička, kiž ju tež hač do lěta 1993 nawjedowaše. Čas je so minyl, a komisija při Mjezynarodnym komiteju slawistow pilnje džěła. Kóždolětnje so člonoj zetkawaja a tuž předleži cyły rjad publikowanych zběrnikow. Předewšěm politiske, hospodarske, socialne a kulturne změny 1990tych lět wobwliwowachu rěčne wuwice słowjanskich rěčow a postajachu tuž temy konferencow. W zašlych lětach koncentrowaše so tematika posedženjow a diskusija na prašenja a problemy rěčneje politiki, a tak stej składnostnje kongresa slawistow 2013 w běloruskim Minsku prof. Hana Gladkova z Prahi a prof. Kina Vačkowa ze Šumena wobšěrny zběrnik wudałoj, kotryž wobsahuje mjez druhim přehlad w słowjanskich krajach płaćiwych zakonskich postajenjow.

Lubi člonoj komisije, lubi hosćo – za lětuše zetkanje sym wuzwolila temu: „Spisowne rěče a medije“, dokelž hraja tradicionelne kaž tež moderne medije w našim razantnje so wuwiacym wobsweće džen a wjetšu rólu tež za słowjanske rěče. Wjeselu so tuž na přednoški, zaběrace so z tutej problematiku. Prjedy pak, hač zaslyšimy postrowne słowa, chcu so wšitkim podžakować, kiž su při organizaciji konferency sobu pomhali, wosebje swojimaj koleginomaj Ani Pohončowej

---

<sup>1</sup> Helmut Faska: Posedženje Mjezynarodneje komisije za słowjanske spisowne rěče w Budyšinje, w: Lětopis A 25 (1978) 1, str. 109–111.

<sup>2</sup> Irena Šěrakowa: Džělowe posedženje Komisije za słowjanske spisowne rěče, w: Rozhlad 27 (1977) 11, str. 434–437.

a Soni Wölkowej. Na kóždy pad chcyła jako dalšich pomocnikow wosobinsce mje-  
nować hišće našeju sobudźělačerjow Měrcina Wirtha a Richarda Bígla kaž tež  
koleginy Beatu Zyndźic, Moniku Šolćinu a Reginu Kindermanowu. Nic naposledk  
je naša pomocnica – studentka wučerstwa Tereza Ledźborec – džensa z Lipska  
k nam přijěła, zo by so wo derjeměće referentow a přitomnych starała.

Džak Wam wšěm!

*Jana Šolćina*